

四庫全書

史部

欽定四庫全書

史部

欽定續文獻通考卷七十六

四至

給事中_臣陳化龍覆勘

總校官內閣中書_臣孫溶

欽定四庫全書

欽定續文獻通考卷七十四

郊社考

祀山川

宋理宗淳祐十二年十二月詔海神為大祀春秋遣從
臣奉命往祠

潛說友咸淳臨安志曰海神壇在東青門外太平
橋之東淳祐十二年有旨中興以來依海建都宜

以海神為大祀下太常議詔守臣馬光祖建殿望祭自寶祐之元歲以春秋二仲遣從官行事

遼太祖七年十一月祠木葉山

臣等謹按木葉山在永州為契丹始祖肇迹之地遼興尊為鎮山歲時臨幸於拜山過樹及詣菩薩堂後必親致祭兼及遼河之神傳世九帝史不絕書望祭遣祠亦間舉焉茲於太祖始祀書之餘不悉載

天贊三年八月次古單于國登阿勒坦音德爾山以鹿
鹿祭

太宗天顯四年

仍太祖
元不改

三月望祀羣神

穆宗應歷十四年七月以酒脯祀黑山

聖宗統和七年二月分遣巫覡祭名山大川

十三年八月詔修山澤祠宇以時祀之

開泰六年五月祠木葉山潢河

遼俗歲十月五京進紙造小衣甲槍刀器械萬副十

五日天子與羣臣望祭木葉山用國字書狀并焚之
國語謂之達勒噶冬至日屠白羊白馬白雁各取血
和酒天子望拜黑山黑山在境北俗謂國人魂魄其
神司之猶中國之岱宗云每歲是日五京進紙人馬
萬餘事祭山而焚之俗甚嚴畏非祭不敢進山

金世宗大定四年六月初定祭五嶽四瀆禮

禮官言嶽鎮海瀆當以五郊迎氣日祭之詔依典禮
以四立土王日就本廟致祭其在他界者遙祀立春

祭東嶽於秦安州東鎮於益都府東海於萊州東瀆
大淮於唐州立夏望祭南嶽衡山南鎮會稽山於河
南府南海南瀆大江於萊州季夏土王日祭中嶽於
河南府中鎮霍山於平陽府立秋祭西嶽華山於華
州西鎮吳山於隴州望祭西海西瀆大河於河中府
立冬祭北嶽恒山於定州北鎮醫巫閭山於廣寧府
望祭北海北瀆大濟於孟州其封爵並仍唐宋之舊
每歲遣使奉御署祝版奩香乘驛詣所在率郡邑長

貳官行事禮用三獻讀祝官一捧祝官二盥洗官二
爵洗官二奉爵官一司尊彘一禮直官四以州府司
吏充

金史范拱傳曰大定七年除太常卿議郊祀或有
言前代都長安及汴洛以太華等山列為五嶽今
既都燕當別議五嶽名寺僚取崧高疏周都豐鎬
以吳嶽為西嶽拱以為非是議略曰軒轅居上谷
在恒山之西舜居蒲版在華山之北以此言之未

嘗據所都而改祀也後遂不改

十五年三月冊長白山神為興國靈應王

十二年有司言長白山在興王之地禮合尊崇議封
爵建廟宇十二月禮部太常學士院奏奉勅旨封興
國靈應王即其山北地建廟宇至是奏定封冊儀物
冠九旒服九章玉圭玉冊函香幣冊祝遣使副各一
員詣會寧府行禮官散齋三日致齋一日所司於廟
中陳設如儀廟門外設玉冊衮冕幄次牙杖旗鼓從

物等視一品儀禮用三獻祭如嶽鎮自是每歲降香
命有司春秋二仲擇日致祭

二十一年冊大房山神為保陵公

以大房山為祖宗陵寢所在特錫公爵冕八旒服七
章圭冊香幣使副持節行禮並如冊長白山之儀申
敕有司歲時奉祀其封域之內禁無得樵採弋獵著
為令是後遣使山陵行禮畢山陵官以一獻禮致奠
二十五年冊混同江神為興國應聖公

有司言昔太祖征遼策馬徑渡江神助順靈應昭著
宜修祠宇加賜封爵乃封神為公致祭如長白山之
儀冊禮視保陵公故事

冊上京護國林神為護國嘉蔭侯

冊禮毳冕七旒服五章信圭遣使詣廟以三獻禮祭
告是後遇月七日上京幕官一員行香著為令

二十七年四月冊盧溝河神為安平侯

十九年有司言盧溝河水勢泛決嚙民田乞官為封

冊神號禮官以祀典所不載難之已而特封安平侯
建廟每歲委本縣長官春秋致祭如今

金史圖克坦克寧傳曰初盧溝河決久不能塞加
封河神安平侯久之水復故道上曰鬼神雖不可
窺測即獲感應如此克寧奏曰神之所佑者正也
人事乖則弗享矣報應之來皆由人事上曰卿言
是也世宗頗信神仙浮圖之事故克寧及之

章宗明昌四年八月冊呼圖哩巴山神為瑞聖公

呼圖哩巴山即瑪達格山大定八年世宗幸金蓮川
七月丙戌次冰井章宗生於茲山之下世宗喜其地
衍而氣清因以命名後更山名曰呼圖哩巴並建廟
焉至是以冕服玉冊封神為公命撫州有司春秋二
仲擇日致祭為常冊文有云念誕彌之初度由翊衛
之効靈蓋不忘誕生之自云至明年六月以出獵登
是山酌酒載拜

十二月冊長白山神為開天弘聖帝

備袞冕玉冊儀物帝御大安殿用黃麾立仗八百人行仗五百人遣使冊之

六年九月冊靜寧山神為鎮安公

靜寧山舊名旺國崖太祖伐遼嘗駐蹕於此世宗大定八年五月始更今名後復建廟是年以冕服玉冊加封號焉

十二月詔加五鎮四瀆王爵

封沂山為東安王吳山為成德王霍山為應靈王會

稽山為永興王醫巫閭山為廣寧王淮為長源王江
為會源王河為顯聖靈源王濟為清源王從沂山道
士楊道全請也

宣宗貞祐三年十一月遣參知政事行河南尚書省候
摯祭河神於宜村

哀宗天興三年正月冊柴潭神為護國靈應王
遣官祭嶽鎮海瀆儀

前三日應行事執事官散齋二日治事如故宿於正

寢如常儀前二日有司設行事執事官次於廟門外
掌廟者掃除廟之内外前一日有司牽牲詣祠所享
官以下常服閱饌物視牲充臚享日丑前五刻執事
者設祝版於神位之右置爵於玷及以血豆陳於饌
所次設祭器皆藉以席掌饌者實之左十籩為三行
以右為上實以乾蓀乾棗形鹽魚鱠鹿脯榛實乾桃
菱茨栗右十豆為三行以左為上實以芹菹荀菹韭
菹葵菹菁菹魚醢兔醢豚拍鹿鶩醢醢左簋二實以

梁稻右簋二實以稷黍俎二實以牲體次設犧尊二
象尊二在堂上東南隅北向西上犧尊在前實以法
酒犧尊初獻官酌象尊亞終獻酌又設太尊一山尊
一在神位前設而不酌有司設燭於神位前洗二在
東階之下直東霤北向罍在洗東加勺篚在洗西南
肆實以巾執罍篚者位於其後又設揖位於廟門外
初獻在西東向亞終及祝在東南向北上開瘞坎於
廟內庭之壬地享日丑前五刻執事官各就次掌饌

者帥其屬實饌具畢凡祭官各服其服與執事官行
止皆贊者引點視陳設訖退就次引初獻以下詣廟
南門外揖位立定贊禮者贊揖次引祝升堂就位立
次引初獻詣盥洗位北向立搢笏盥手悅手執笏詣
爵洗位北向立搢笏洗爵以爵授執事者執笏升堂
詣酌尊所西向立執事者以爵授初獻初獻搢笏執
爵執尊者舉冪執事者酌酒初獻以爵授執事者執
笏詣神位前北向立搢笏跪執事者以爵授初獻初

獻執爵三祭酒奠爵訖執笏俛伏興少立次引祝詣神位前東向立搢笏跪讀祝訖執笏興退復位初獻再拜贊禮者引初獻復位次引亞獻酌獻並如初獻之儀次引終獻並如亞獻之儀贊者引初獻官詣神位前北向立執事者以爵酌清酒進初獻之右初獻跪祭酒啐酒奠爵執事者以俎進減神座前胙肉前脚第二節共置一俎上以授初獻初獻以授執事者初獻取爵遂飲卒爵執事者進受爵復於坫初獻興

再拜贊者引初獻復位贊者曰已飲福受胙者不拜
亞獻官以下皆再拜拜訖次引初獻以下就望座位
以饌物置於坎東西廂各二人贊者曰可瘞置土半
坎又曰禮畢遂引初獻以下出祝與執尊疊篚冪者
俱復位立定贊者曰再拜再拜訖遂出祝版燔於齋
所

元太祖十七年三月封崑崙山為元極王大鹽池為惠
濟王

時討契丹遺族十六年帝駐大雪山前抄馬都鎮撫
郭寶玉請封山川神從之

世祖中統二年七月遣使持香幣祀嶽瀆

嶽鎮海瀆代祀自是年始凡十有九處分五道後乃
以東嶽東海東鎮北鎮為東道中嶽淮瀆濟北海南
嶽南海南鎮為南道北嶽西嶽后土河瀆中鎮西海
西鎮江瀆為西道既而又以驛騎迂遠復為五道道
遣使二人集賢院奏遣漢官翰林院奏遣蒙古官出

璽書給驛以行其禮物則每處歲祀銀香合一重二十五兩五嶽組金幢二鈔五百貫四瀆織金幡二鈔二百五十貫四海五鎮銷金幡二鈔二百五十貫至則守臣奉詔使行禮皇帝登寶位遣官致祭降香幡合如前禮惟各加銀五十兩五嶽各中統鈔五百貫四瀆四海五鎮各中統鈔二百五十貫或他有禱禮亦如之

至元三年定歲祀嶽鎮海瀆之制

正月東嶽鎮海瀆土王日記泰山於泰安州沂山於
益都府界立春日記東海於萊州界大淮於唐州界
三月南嶽鎮海瀆立夏日遙祭衡山土王日遙祭會
稽山皆於河南府界立夏日遙祭南海大江於萊州
界六月中嶽鎮土王日記嵩山於河南府界霍山於
平陽府界七月西嶽鎮海瀆土王日記華山於華州
界吳山於隴縣界立秋日遙祭西海大河於河中府
界十月北嶽鎮海瀆土王日記恒山於曲陽縣界醫

巫閭山於遼陽廣寧路界立冬日遙祭北海於登州
界濟瀆於濟源縣祀官以所在守土官為之既有江
南乃罷遙祭

四年正月封實默圖山為武定山其神曰武定公泉為
靈淵其神曰靈淵侯

七年二月築昭應宮於高梁河

臣等謹按水經注濕水又東南高梁之水注焉水
出薊州西北平地泉東注經燕王陵北又東逕薊

城北又東南流入濕水魏征北將軍建城鄉侯劉靖始導高梁河造戾陵遏開車箱渠灌田其後興廢不常至元二十九年都水監郭守敬導白浮甕山諸泉水至西門入都城東至通州河成名通惠其時於義和門外西北一里置西城牌即古高梁河也是年築官河上名曰昭應疑為祀河神而設而他無可證姑載之以俟考

十二年二月立河瀆廟於河中

十四年七月回水窩淵聖廣源王加封善佑常山寧濟
昭應王加封廣惠安邱電泉靈霈侯加封靈霈公

十六年五月進封桑乾河洪濟公為顯應洪濟公

臣等謹按桑乾河神是年已敕進封而世祖紀又
載至元二十二年二月加封桑乾河神洪濟公為
顯應洪濟公於舊號無所增加其為重載無疑或
別加封字而史失載然不可考矣

十七年十二月修桐栢山淮瀆祠

二十二年十月修南嶽廟二十七年九月修南海廣

德王廟

二十一年閏五月加封衛輝路小清河神為洪濟威惠

王

二十八年二月詔加嶽瀆四海封號各遣官詣祠致祭

中統初遣道士或副以漢官至是年正月帝謂中書
省臣言曰五嶽四瀆祠事朕宜親往道遠不可大臣
如卿等又有國務宜遣重臣代祀之漢人遣名儒及

道士習祀事者是月命加嶽瀆海神封號詔曰朕惟
名山大川國之秩祀今嶽瀆四海皆在封宇之內民
物阜康時惟神休而封號未加無以昭答靈貺可加
上東嶽為齊天大生仁聖帝南嶽司天大化昭聖帝
西嶽金天大利順聖帝北嶽安天大貞元聖帝中嶽
中天大寧崇聖帝加封江瀆為廣源順濟王河瀆靈
源弘濟王淮瀆長源溥濟王濟瀆清源善濟王東海
廣德靈會王南海廣利靈孚王西海廣潤靈通王北

海廣澤靈祐王仍各遣官詣神致告以稱朕敬恭明
神之意

成宗大德二年二月詔諸王駙馬毋擅祀嶽鎮海瀆
先是元年六月諸王伊爾根遣使乘驛祀嶽瀆命追
其驛券仍切責之因有是令

刑法志曰諸五嶽四瀆五鎮國家秩祀有常諸王
公主駙馬輒遣人降香致祭小民僭禮犯義以祈
禱褻瀆者並禁之

東平布衣趙天麟上太平金鏡策畧曰臣聞天子祭天地及天下之名山大川諸侯祭社稷及名山大川之在其地者大夫祭五祀士祀宗廟庶人祭祖考於寢上得兼下下不得僭上皆有制以節之今國家稱秩元祀咸秩無文既有禮部太常司侍儀司以備其節文又詔令所在官司歲時致祭五嶽四瀆名山大川歷代聖帝明王忠臣節士之載在祀典者皆其宜也竊見方今小民不安常典妄

事明神其類甚多不可枚舉夫東嶽者太平天子
告成之地東方藩侯當祀之山今乃有倡優戲譌
之徒貨殖屠沽之子每年春季四方雲聚有不遠
千里而來者有提挈全家而至者干越邦典滌瀆
神明停廢產業耗損食貨亦已甚矣伏望陛下申
明前詔使天下郡縣官各祭名山大川聖帝明王
忠臣節士之在其地者凡下民當祭之神如祖考
及門庭戶竈等聽之凡非典所當祀而祀者禁之

無令妄瀆凡祈神賽社漿酒藿肉飾立神像泥金
鏤木者禁之無令妄費如是則非但巫風寢消抑
亦富民一助

三月詔加五鎮封號

東鎮沂山為元德東安王南鎮會稽山為昭德順應
王西鎮吳山為成德永靖王北鎮醫巫閭山為貞德
廣寧王中鎮霍山為崇德應靈王敕有司歲時與嶽
瀆同祀著為令式

泰定帝泰定二年閏正月浙江道廉訪司請慎擇代祀之使

言四方代祀之使棄公營私多不誠潔以是神不歆格請慎擇之

四年十月改封建德路烏龍山神為忠顯靈澤普佑孚惠王

致和元年四月改封蒙山神為嘉惠昭應王洞庭廟神為忠惠順利靈濟昭佑王

順帝至正元年十二月加封真定路滹沱河神為昭佑
靈源侯

十一年四月加封河瀆神為靈源神佑弘濟王仍重建
河瀆廟

先是元年河決遣禮部尚書台哈布哈以圭玉白馬
致祭河神四年河決白茅堤又決金堤方數千里民
被其患五載不能塞是年中書右丞相托克托用都
漕運使前工部郎中嘉魯計請塞之入奏稱上旨乃命魯以

工部尚書為總治河防使四月鳩工十一月水土工畢諸堤埽成河復故道帝遣貴臣報祭河伯至是乃加封并重建廟焉

重建西海神廟

山西通志曰西海神廟在蒲州府永濟縣南門外宋以立秋日於河中府河瀆廟望祭元至元十二年敕建西海神廟於河中春秋致祭及祭告儀帛一視河瀆禮

臣等謹按西海神自唐以後皆於河瀆廟望祭至元初始即河中府別建廟考世祖紀至元十二年立河瀆等廟而不及西海蓋史失之據是年重建之文繫於河瀆之下則前此立廟河中可知叅互以證足明史傳之缺

二十一年十一月黃河清遣官祀河神

黃河自平陸三門磧下至孟津五百餘里皆清凡七日命祕書少監程徐祀之

臣等謹按史獄鎮海瀆元世祖時代祀幾無虛歲
其後歷朝亦修祀事惟謹或命重臣或遣羽士或
一歲徧祠或因事專祭其有司歲時之祀不與焉
大率徼福之舉居多故不悉載

明太祖吳元年八月祀山川

洪武元年正月命使往登萊祭海神

時遣道士周原德往祭原德未至前數日濱海民見
海濤恬息聞空中若有神語者皆驚異及原德至臨

祭靈風清肅海潮響應父老皆欣喜相賀謂原德曰
海濤不息者十餘年矣今聖人應運太平有兆何幸
身親見之原德還奏帝悅

三月遣官祭魯山淮川之神

二年正月分建地祇壇

帝以太歲山川諸神合祭城南未有壇壝命禮官定
制至是禮官議上略曰虞舜祭四嶽王制始有五嶽
之稱周官小宗伯兆四望於四郊鄭注以四望為五

嶽四鎮四瀆詩序曰巡狩而祀四嶽河海則又有四海之祭蓋天子方望之祀無所不通而嶽鎮海瀆在諸侯封內則各以其方祀之秦罷封建嶽瀆皆領於祠官及漢復建諸侯則侯國各祀其封內山川天子不預焉武帝時諸侯或分或廢五嶽皆在天子之邦宣帝時始有使者持節代祀嶽瀆之禮由魏及隋嶽鎮海瀆皆即其地立祠命有司致祭唐宋之制有命本界刺史縣令之祀有因郊祀望祭之祀又有遣使

之祀元遣使祀嶽鎮海瀆分東西南北中為五道其
天下山川之祀虞書曰望于山川徧于羣神周頌曰
懷柔百神周禮小宗伯兆山川邱陵墳衍各因其方
王制凡山川之小者其祭秩視伯子男其在諸侯封
內者諸侯又自祭之如楚祭雒漳晉祭惡池齊祭配
林是已秦罷封建則皆領於祠官由漢唐以及宋元
嶽鎮海瀆之外又有羣山川之祀今宜以嶽鎮海瀆
及天下山川城隍諸地祇合為一壇與天神埒春秋

專祀遂定祭日以清明霜降壇高廣視天神前期一
日皇帝躬省牲至日服通天冠絳紗袍詣嶽鎮海瀆
前行三獻禮山川等神分獻官行禮於是祀地祇則
五嶽五鎮四海四瀆並列南向次鍾山江東兩淮兩
浙江西湖廣山東山西河南陝西北平福建廣東廣
西海南海北左右兩江山川之神並京都各府城隍
外夷山川之神皆東西相向位皆用犢一羊一豕一
籩豆各八簋簋各二酒尊三帛一樂用雅樂三年復

與天神合祀皆躬行禮先祭禮官奏祝文太歲以下
至四海凡五壇稱臣者親署御名其鍾山諸神稱余
者請令禮官代署帝曰朋友書牘尚親題姓名況神
明乎遂親署後又定驚蟄秋分後三日遣官祭山川
壇諸神七年令春秋仲月上旬擇日以祭

詳星
辰門

帝既以天下山川附祭嶽瀆壇又以安南高麗皆臣
附其國內山川宜與中國山川同祭諭中書及禮官
考定安南之山二十有一曰佛蹟曰徹圍曰武寧曰

仙游曰普賴曰萬劫曰傑特曰安子曰地觀曰天養
曰神投曰龍岱曰文場曰安獲曰卞曰立石曰香象
曰崇曰都隆曰測曰分其江有六曰川瀘曰富良曰
大黃曰大歷曰蘇歷曰三帶其水有六曰安石淵曰
石龍門曰茲廉曰浪泊曰越裳宛曰九德宛高麗山
有三曰魯陽曰嵩曰葦水有四曰川禮成曰鹽難水
曰涓水曰馬訾水即鴨綠江也遂命著之祀典設位
以祭六年正月祀琉球山川

遣使祭嶽鎮海瀆

時遣都督孫遇遷等十八人以行帝皮弁御奉天殿
視香祝躬署御名以授使者百官公服送至中書省
使者奉以行金合貯香黃綺襜二白金二十五兩具
祭物牲用太牢幣各隨其方色祭畢鑄祝文於廟石
賜守祠者金

明會典曰嶽鎮海瀆凡遇登極必遣官分投祭告
東嶽泰山山東泰安州祭西嶽華山陝西華陰縣

祭中嶽嵩山河南河南府祭南嶽衡山湖廣衡州
府祭北嶽恒山直隸真定府祭東嶽沂山山東青
州府祭西鎮吳山陝西隴州祭中鎮霍山山西平
陽府祭南鎮會稽山浙江紹興府祭北鎮醫巫閭
山遼東祭東海山東萊州府祭西海山西蒲州祭
南海廣東廣州府祭北海河南南懷慶府祭江瀆四
川成都府祭河瀆山西蒲州祭淮瀆河南南陽府
祭濟瀆河南懷慶府祭

三年正月遣使祀安南高麗占城諸國山川

遣使之儀與遣祭中國嶽瀆之使相類更命各國圖其山川及摹錄碑碣圖籍付使者還所至諸國皆勒石紀其事略曰朕賴天地祖宗眷佑位臣民上郊廟社稷以及嶽鎮海瀆之祭不敢不恭邇者占城安南高麗遣使奉表稱臣已封其王則其國境內山川悉歸職方古者天子望祭雖無不通然未聞有遣使致祭於其境者今思與普天之下共享昇平之治故具

牲幣遣使往祭於神神既歆格必能庇其國王世保境土使風雨以時年穀豐登民庶得以靖安庶昭一視同仁之意

六月詔定嶽鎮海瀆諸神號

帝躬署祝文遣官以更定神號告祭仍頒詔於安南占城高麗略曰為治之道必本於禮嶽鎮海瀆之封起自唐世崇名美號歷代有加朕思英靈之氣萃而為神必受命於上帝豈國家封號所可加瀆禮不經

莫此為甚今依古定制並去前代封號五嶽稱東嶽
泰山之神南嶽衡山之神中嶽嵩山之神西嶽華山
之神北嶽恒山之神五鎮稱東鎮沂山之神南鎮會
稽山之神中鎮霍山之神西鎮吳山之神北鎮醫巫
閭山之神四海稱東海之神南海之神西海之神北
海之神四瀆稱東瀆大淮之神南瀆大江之神西瀆
大河之神北瀆大濟之神

十二月遣使祭南海

六年正月遣使祭江瀆之神

禮官言往者四川未平望祭江瀆於峽州今川蜀既下宜遣官詣南瀆大江神廟致祭乃遣戶部主事王性中往祭給白金二十兩具祭物

四月罷祭天下山川各祀於其境

帝諭中書省及禮臣始天下方定其山川皆統祀於京師然古者諸侯祭封內山川今行省大臣與古方伯連帥無異其境內山川當祭者其定制頒行之於

是禮臣議嶽鎮海瀆禮秩尊崇及京師山川皆國家
常典非諸侯所得預者各省惟祭風雲雷雨及境內
山川之神宜共為一壇設二神位以省臣初獻都指
揮司官亞獻府官終獻祭期春用鶩蟄後三日秋用
秋分後三日每位牲用羊一豕一籩豆四簋簋二爵
三釶犧象尊各一祝一風雲雷雨帛四山川帛二凡
祭齋三日制可自是天下山川皆各省官自祭舊合
祭京師及四夷山川悉罷之惟甘肅新附其山川仍

附祭京師八年禮部尚書牛諒言京都既罷祭天下山川其四夷山川亦非天子所當躬祀中書及禮臣請附祭各省從之廣西附祭安南占城真臘暹羅鎖里廣東附祭三佛齊爪哇福建附祭日本琉球渤泥遼東附祭高麗陝西附祭甘肅朶甘烏思藏京城更不復祭又從禮官言各省山川居中南向外夷山川東西向同壇共祀

七年十一月頒嶽鎮海瀆儀於所在有司

祭用羊豕一帛一隨其方色籩豆簋簠皆四鉶一爵
三尊三祭期春二月秋八月上旬擇日

九年正月定王國祭山川禮

山川壇建於端禮門外之西南殿二一以棲神一以
望拜十三年重定壇制高四尺廣三丈五尺一寸四
出陞壇廣二十丈高五尺置櫺星門四壇在壇內稍
北居三分之一外垣南門置屋列戟十二北神門無
屋十八年定祭儀同社稷惟不瘞毛血二十三年定

王國有嶽鎮海瀆者凡祭以嶽為正鎮海瀆次之風
雲雷雨之神又次之既又命東海則燕齊皆祭東嶽
東鎮齊魯皆祭西海秦蜀皆祭晉祭北海又詔公侯
府第俱立壇祭本處山川以御製祭文並神壇圖式
頒之

復定山川壇制

嶽鎮海瀆鍾山與太歲風雲雷雨為七壇居正殿京
畿山川與夏冬月將列東廡春秋月將及京都城隍

列西廡正殿親祭西廡遣官分獻

詳星辰門

八月分遣國子生修嶽鎮海瀆祠

帝諭禮臣嶽鎮海瀆祀典所重所在祠宇宜致尊嚴以稱神居於是分遣國子生周渭等三十一人往修祠宇各賜巾衣靴襪俾所至齋沐而後行事仍命禮部嶽鎮海瀆之祀凡遣官行禮及所在有司致祭勿與京師同日二十二年命工部遣官修中嶽祠宇十年六月命大臣十八人分祀嶽鎮海瀆賜之制

韓國公李善長祀中嶽魏國公徐達祀北嶽曹國公李文忠祀東嶽宋國公馮勝祀西嶽江夏侯周德興祀南嶽吉安侯陸仲亨祀東鎮延安侯唐勝宗祀西鎮江陰侯吳良祀南鎮濟南侯顧時祀北鎮平涼侯費聚祀中鎮陸安侯王志祀東海營陽侯楊璟祀西海永嘉侯朱亮祖祀南海潁川侯傅友德祀北海宜春侯黃彬祀江瀆南安侯俞通源祀河瀆中山侯湯和祀淮瀆宣寧侯曹泰祀濟瀆制曰百神之祀乃國

家之先務朕與卿等當羣雄角逐戰勝攻取非天地
昭鑒嶽鎮海瀆効靈安得至是今孟秋在邇理宜報
祭古者人君巡狩則祭名山大川於方嶽之下今國
家新造民生始遂朕未獲親往特命卿等代朕以行
十一年正月以封建諸王遣使祭蜀湘諸國山川

時封皇子椿為蜀王栢為湘王桂為豫王棖為漢王
植為衛王改封吳王櫛為周王

二十一年六月遣神樂觀道士解性初祭雲南境內山

川

成祖永樂元年九月修中嶽嵩山廟

七年二月封南海神為寧海伯

時遣使往諸番國神屢著靈應故封之

十八年十二月北京山川壇成

明年正月命黔國公沐晟詣壇奉安太歲諸神及山川諸神主位置陳設與南京舊制同惟正殿鍾山之
右增祭天壽山之神

英宗正統三年八月修南嶽祠

巡按御史陳祚言南嶽神廟頽敗請撤去殿宇像設
依祀山川例為壇以祭禮臣重興革不允其請仍命
大吏督有司修復至景泰六年十月再修

孝宗弘治六年七月兵部尚書馬文升請改祀北嶽於
渾源州不允

文升言北嶽恒山在今大同府渾源州宋有天下未
能混一北為契丹所有故祭北嶽於真定府曲陽縣

迨我太宗遷都北平而真定乃在京都之南當時禮
官亦未建明猶祭北嶽於曲陽臣考周禮載恒山為
并州之鎮在正北我朝一統志亦載恒山在渾源州
南三十里即北嶽以此觀之則北嶽當在渾源州無
疑今本州北嶽廟址猶存乞勅禮部詳考移文山西
守臣於渾源州恒山舊址修建北嶽廟以後歲祭於
此行禮下禮臣議以為祀北嶽恒山於曲陽歷漢唐
宋以至國朝幾三千年未之有改其渾源州雖有恒

山亦名北嶽然祀典不聞碑誌無考况今恒山實為
畿內鉅鎮孕美已久一旦廢此舉彼恐有窒礙如文
升所奏渾源州恒山既為一方之望古蹟間存其洪
武年間重修廟宇年久頽敝請下所司量加修葺春
秋致祭用垂悠久從之世宗嘉靖初科臣陳棐復請
改祀不允神宗萬曆十四年巡撫胡來貢再請禮臣
據大明集禮定議仍祀曲陽

世宗嘉靖二年三月遣官祭東嶽

六年詔建河神祠於沛縣

時漕河復通議者以為神助請復其故宇春秋致祭
工部以請從之

七年二月遣官祭河神

先是六年十二月河南靈寶縣黃河清五十里至是
遣太常寺官齋祝往祭

八年八月始親祭山川著為令

詳星
辰門

十年七月改建地祇壇

先是分雷雨風雲為天神嶽鎮海瀆陵山及京畿天下名山大川為地祇至是合建壇於先農壇南天神在左南向地祇在右北向又加祖陵山曰基運皇陵山曰翊聖孝陵山曰神烈顯陵山曰純德與嶽鎮海瀆并祀凡五壇從壇二京畿山川西向天下山川東向以丑辰未戌年親祭餘年遣大臣攝祭

互見星辰門

二十六年十月命祀小孤山神

先是獻皇帝舟次小孤製詩一篇留廟中至是勒詩

於石建亭藏之廟故士民私建為小姑神女像命改
用水主題小孤山之神賜額曰小姑山廟令有司春
秋致祭又聖母舟過曾遭致茶果留龍盤三彩盤九
即用以盛祭品龍盤饗食一麥餅二彩盤果五蔬四
牲用少牢帛一爵三箸為令

穆宗隆慶元年正月罷祀山川壇

詳星辰門

六年三月詔祀沿河水神諸廟

從工部尚書朱衡請也

祭山川儀

詳星辰門

臣等謹按明初建山川壇嶽瀆山川與太歲諸神同祀其後改天神地祇壇或分或合祭儀則同已見星辰門不重載

遣官祀嶽鎮海瀆山川城隍儀

齋戒降香陳設正祭俱如祭太歲儀惟迎神瘞毛血改望燎為望瘞

欽定續文獻通考卷七十四

欽定四庫全書

欽定續文獻通考卷七十五

郊社考

祈禳

禱疾 祓除
禱水旱已見 雩祭門

宋寧宗嘉定元年六月以蝗禱於天地社稷

八年八月蝗禱於霍山九年六月蝗禱羣祀

理宗紹定四年九月以太廟火災告於天地宗廟社稷
嘉熙三年八月以浙江潮患告於天地宗廟社稷

景定五年十月帝有疾命官分禱天地宗廟社稷宮觀
遼太祖神冊四年十月次烏爾古部以大風雪兵不能
進禱於天俄頃而霽

太宗會同五年六月以皇太后不豫禱於太祖廟

時駐陽門關聞皇太后不豫即馳入侍湯藥必親嘗
仍告太祖廟幸菩薩堂飯僧五萬人七月乃愈

聖宗統和四年九月皇太后行再生禮十月皇太后復
行再生禮為帝祭神祈福

臣等謹按再生禮每十二年一舉無一歲再行者
茲為帝祈福蓋創舉也故書之餘不悉載

再生禮儀

凡十有二歲皇帝本命前一年季冬之月擇吉日前
期禁門北除地置再生室母后室先帝神主與在再
生室東南倒植三歧木其日以童子及產醫姬置室
中一婦人執酒一叟持矢箠立於室外有司請神主
降輿致奠奠訖皇帝出寢殿詣再生室羣臣奉迎再

拜皇帝入室釋服跣以童子從三過歧木之下每過
產醫嫗致詞拂拭帝躬童子過歧木七皇帝卧木側
叟擊箠曰生男矣太巫懷皇帝首興羣臣稱賀再拜
產醫嫗受酒於執酒婦以進太巫奉襁褓綵結等物
贊祝之預選七叟各立御名繫於綵皆跪進皇帝選
嘉名授之賜物再拜退羣臣皆進襁褓綵結等物皇
帝拜先帝諸御容遂宴羣臣

臣等謹按遼俗每十二年一行始生之禮惟帝與

太后太子及額爾奇木得行之名曰再生又名覆
誕蓋以歲一周星因天道更新之象而預祓除之
亦禮禳頌禱之義也史稱始以三過岐水俾念母
氏劬勞終拜先帝御容勗以敬承宗廟為蘇爾威
汗之善於垂訓顧名思義或亦有取與

金章宗承安四年八月以皇嗣未立命有司祈於太廟
至五年復以繼嗣未立禱祀太廟山陵少府監張汝
猷言皇嗣未立亡親行祀事之後遣近臣詣諸嶽觀

廟祈禱詔司空襄往亳州禱太清宮既遣刑部員外
郎完顏匡往焉泰和元年春襄承命馳禱太清宮及
后土方嶽

宣宗興定二年京師屢火遣禮部尚書楊雲翼崇之
三年七月以地震遣叅知政事圖克坦思忠祭地祇於
上清宮八月遣禮部尚書楊雲翼祭社稷翰林侍讀學
士趙秉文祭后土於河中府

元成宗大德九年十二月帝有疾遣宣政院使實迪等

禱於太廟

泰定帝泰定元年十月遣使祀鹽官州海神

時鹽官州海水溢屢壞堤障侵城郭特遣使祀之三年八月大風海溢復壞堤防三十餘里再遣使祭不止徙居民千二百五十家致和元年三月遣戶部尚書李嘉努往鹽官祀海神仍集議修海岸造浮屠二百六以厭海溢

臣等謹按鹽官海神世宗時嘗以海岸崩遣使命

天師祈祀潮即退語載河渠志泰定元年三年事
志皆不載止載四年五月以潮水衝敗海岸平章
圖們岱尔茶議遣直省舍人巴延奉御香令天師
依世祖例祈祀制可是世祖以後泰定四年以前
中間又似無遣使事或者河渠志誤以元年為四
年耶志又云文宗天歷元年八月十日至十九日
正當大汎潮勢不高風平水穩十四日祈請天妃
入廟是鹽官海神亦有天妃也

二年六月皇子生命巫祓除於宮

四年九月以災變命祀天地享太廟致祭嶽瀆及名山大川以禳之

是歲四方霖潦旱蝗河決海溢山崩地震日食星變屢告至是以災變赦天下復祀以禳之

文宗天曆二年八月幸世祖所御幄殿祓除

十二月又祓祭於太祖幄殿

臣等謹按元祓祭每於八月十二日行之謂可以

脫舊災迎新福為國俗之常故史皆不書獨文宗紀兩載之皆於祖宗幄殿行事蓋文宗以篡竊得國隱有不安於心者欲藉祖宗以厭之耳

祭祀志曰國俗舊禮每歲駕幸上都以八月二十四日祭祀謂之灑馬妳子用馬一羈羊八綵段練絹各九疋以白羊毛纏若穗者九貂鼠皮三命蒙古巫覡及蒙古漢人秀才達官四員領其事再拜告天又呼太祖青吉斯御名而祝之曰託天皇帝

福蔭年年祭賽者禮畢掌祭官四員各以祭幣表裏一與之餘幣及祭物則凡與祭者共分之每歲十二月下旬擇日於西鎮國寺內墻下灑掃平地太府監供綵幣中尚監供細氈鍼線武備寺供弓箭環刀束稗草為人形一為狗一剪雜色綵段為之腸胃選達官世家貴重者交射之非伯蘇札拉爾奈曼蒙古岱拉拜塔坦沙卜珠蘇尼特等氏族不得與列射至縻爛以羊酒祭之祭畢帝后及太

子嬪妃併射者各解所服衣俾蒙古巫覡祝讚之
畢遂以與之名曰脫災國俗謂之射草狗每歲十
二月十六日以後選日用白黑羊毛為線帝后及
太子自頂至手足皆用羊毛線纏繫之坐於寢殿
蒙古巫覡念咒語奉銀槽貯火置米糠於其中沃
以酥油以其烟薰帝之身斷所繫毛線納諸槽內
又以紅帛長數寸帝手裂碎之唾之者三併投火
中即解所服衣帽付巫覡謂之脫舊災迎新福云

又曰世祖至元七年以帝師帕克斯巴之言於大明殿御座上置白傘蓋一頂用素段泥金書梵字於其上謂鎮邪伏魔護安國刹自後每歲二月十五日於大殿啟建白傘蓋佛事用諸色儀仗社直迎引傘蓋周遊皇城內外云與衆生被除不祥導迎福祉

明太祖洪武六年五月定太歲諸神春秋報禮

詳星辰門

十七年十二月以大將軍徐達疾禱於山川城隍之神

是年太陰數犯上將帝憂之詔達還朝十二月有疾
帝禱諸神曰曩者天下有亂朕命將偃兵息民大將
軍徐達之功為多今疾弗瘳朕特告神願全生數載
固寧萬姓朕他日與達同往惟神鑒之明年二月達
卒

成祖永樂五年五月以征安南遣官遍祀嶽鎮海瀆及
安南山川城隍之神

以將士衝冒炎暑慮生疾病遣官奉香帛遍禱以祈

神佑

六年十二月命安遠伯柳升巡捕倭寇仍祭告東海
九年七月陝西疫遣官祭告西嶽及陝西山川諸神
十六年十一月遣官祭東海之神

時浙江瀕海諸縣風潮衝激堤岸墊溺居民修治迄
無成功帝乃齋戒遣保定侯孟瑛等以大牢往祭水
患頓息

英宗正統六年正月以莊浪地屢震躬祀郊廟遣官祭

告西方嶽鎮

四月以南京烈風為災遣官祭孝陵及鍾山大江之神
九年閏七月南京大風雨雹壞壇壝陵廟復遣官祭
告孝陵及鍾山大江之神

八年五月以雷震奉天殿鵠吻遣官祭告天地

明年閏七月以雷震奉先殿鵠吻親告太廟復遣官
祭告天地

十年正月以太倉屢火遣官祭太歲及火神

六月以浙江台州寧波紹興諸處及陝西西安府疫遣
官祭南鎮西嶽西鎮

十一年十二月甘州疫復遣官禱西嶽西鎮及甘肅
境內山川之神

十一年二月異氣見華蓋奉天殿遣官祭告天地
景帝景泰四年三月以災變屢見遣官祭告天地

祝曰恭承大命主宰華夷負荷弗勝積愆深重宵旰
悔省悛改無由爰致身心每欠安順天時人事垂戒

甚明起居憂惶震驚無措仰祈洪造特賜矜憐俾圖
自新獲趨康泰

六年五月以時多災異命各省巡撫等官祭天下嶽鎮
海瀆山川諸神以申祈禱

英宗天順元年七月以承天門災躬禱南郊遣官祭告
廟社山川城隍諸神

是年六月彗星犯營室占者謂咎在母后帝詣南郊
躬禱八月以彗星屢見復禱

憲宗成化三年四月以四川地震遣官祭告境內山川
七年四月以災疫流行遣官祭告山川諸神

九月遣工部侍郎李顥祭海神

時浙江潮溢漂民居鹽場特遣顥往祭並修築堤岸
八年四月京師久旱運河水涸遣官禱於郊社山川淮
瀆東海之神

九年六月寧夏地震命巡撫等官祭告賀蘭山之神
十二年七月以黑眚見躬禱天地於禁中

時有妖物夜出齧人都城驚擾帝為文以告以用度
不節工役勞民忠言不聞仁政不施四事自責

十三年四月以四方災異迭見遣官祭嶽鎮海瀆並鍾
山之神

二十一年四月以泰山屢震遣官祭告

孝宗弘治元年四月天壽山雨雹遣官祭諸陵及天壽
山

七年二月以孝陵風雷之變遣官祭告

十年三月以京師山東山西陝西諸處災異迭見遣官
祭告郊社山川命所司分禱封內山川

十一年十月清寧宮災遣官告郊廟社稷山川

十八年九月

武宗已即位

以霖雨方霽星變繼作遣官祭告

郊廟社稷

武宗正德元年六月以彗星見遣官祭告郊廟

三年十月以南直隸湖廣河南諸處災傷遣官祭告天

下名山大川

六年七月以四方災旱盜賊遣官祭告郊廟社稷山川及天壽山之神並令守臣祭告嶽鎮海瀆

八年五月以四方災異遣官祭告郊社及山川諸神

時禮部尚書傅珪等疏列四方災異且曰春秋二百四十二年所書災異不過六十九事今自去年秋九月至夏四月地震天鳴雹降星隕龍火出見山崩地裂共四十有二而旱災不與焉頃雖降旨修省祭告而雨澤未通禾苗枯槁民命國計不可不憂伏望勵

精更化並勅諸臣省躬補過擇日齋戒祭告以回天
意從之於是再遣官祭告

九年正月乾清宮災遣官祭告郊廟社稷山川諸神

世宗嘉靖元年正月以火災風霾遣官祭告郊廟社稷
十月復以京師地震再行祭告

二年四月以災異修省遣官祭告郊廟社稷山川

三年四月復以災旱風霾遣官祭告並罷端陽節驃
騎龍船遊宴

五年十月以四方災變非常遣官祭告郊廟社稷山川
並被災所在名山大川應祀神祇

八年十月乾清宮內七所房災親禱天地於宮中

九年四月以京師風霾遣官祭告天壽山

十二月以祈嗣祭告太廟世廟

大學士張璉請以求嗣之誠告太廟世廟以祈祖考
之祐帝納之擇日告廟十年十一月復於欽安殿建
祈嗣醮壇帝親詣進香行禮

詳高
祿門

十一年二月大學

士李時等以聖嗣未降請遣廷臣詣嶽鎮名山祝禱
帝不欲遣使擾民命分遣道士齋香帛令所在守臣
行禮廷臣分詣地祇壇祈告於是禮部尚書夏言言
我朝建地祇壇自岳鎮海瀆以及遠近名山大川莫
不懷柔即此而禱正合古人望行之義但輔臣所請
止於嶽鎮竊以山川海瀆發祥效靈與嶽鎮同功况
基運翊聖神烈天壽純德諸山又祖宗妥靈之地祈
禱之禮皆不可缺遂命大臣詣壇分祀

十年五月雷震午門樓及西華門樓柱親禱天地於宮
中

十二年六月以彗星見告於便殿

十三年七月以南京太廟災告天於殿陛即詣太廟行
奉慰禮

先期諭閣臣禮官曰慰廟之禮有謂必待擇日齋沐
乃可舉行此禮之常今因災而祭禮之變也譬之人
子聞變必奔詣父母所以慰安之何待正衣冠而後

行

十五年十月京師地震親禱於宮中

十六年五月雷震謹身殿露告於宮中遣官告太廟世廟

十八年六月以雷震奉先殿祭告於元極寶殿遣官

祭北郊

九月以太后疾躬禱廟社山川

帝憚於出郊於文華殿設壇祀山川餘皆親詣行禮

十七年二月建祈壽齋醮於元極寶殿

是月丙午帝謂輔臣曰臣子之於君親願壽為最今
聖母壽辰於今夕中夜設壇元極寶殿為母祈壽於
上帝分命卿等禱於神祇諸壇以來日巳時行事服
用祭服

臣等謹按帝即位之初太監崔文誘帝建醮宮中
日夜不絕廷臣交章諫不聽六年雖命草三經殿
外二寺齋醮而內殿營奉如故祈皇嗣則建醮祈

母壽則建醮以至春祈秋報著為歲典安神却敵
禮並郊禋以青詞進奉者且得躡位宰輔逮至暮
年獻芝獲免賜藥降桃悉舉而歸之元貺齋醮無
虛日停封事至踰二旬而帝之志荒矣實錄具載
其事因附紀其畧於此以見一代之秕政焉

二十年四月太廟災祭告郊社景神殿遣官分祭日月
神祇及應祀之神

八月以漕渠水涸遣官祭河淮諸神

二十一年七月以邊患遣官祭神祇壇及團營神祇
是年十一月以宮變遣官祭告郊廟社稷及應祀神
祇

二十九年八月以邊警遣內侍祭禱太廟

至三十二年九月以敵退告謝郊廟

三十四年二月遣工部侍郎趙文華祭告海神

時文華疏陳備倭七事其一祀海神言天吳顯靈廟
在萊州請遣官望祭於江陰常熟以激人心從之即

命文華往祭

十一月以各邊秋防事竣遣官祭告郊廟社稷先聖帝
王

三十五年二月陝西地震遣官祭告境內山川河洛及
應祀神祇

三十六年四月以奉天諸殿災遣官祭告郊廟社稷
時以火星逆行遣官祈禱於洪應雷殿並祭告元極
寶殿及廟社至是果災四十四年三月大明門災遣

官祭告如前

八月以徐邳河淤命河道官祭告大河東嶽諸神

穆宗隆慶三年八月以洪水為患命河道官祭告四瀆

東海嶽鎮南鎮北嶽

熹宗天啟元年二月以海運遭風遣官祭告海神

五月以遼瀋繼失遣官祭告郊廟社稷山川

欽定續文獻通考卷七十五

欽定四庫全書

欽定續文獻通考卷七十六

郊社考

告祭

立君
巡狩

建都
征伐

封國
告宗廟附

宋寧宗嘉定十四年六月以立皇子告於天地宗廟社稷

十七年閏八月

時理宗
初位

以即位告於天地宗廟社稷宮

觀諸陵

理宗端平元年四月以減金告太廟

時獲其主完顏守緒遺骨以告太廟其玉寶法物並俘囚張天綱完顏輝罕等命有司審實以聞

開慶元年以邊事孔棘命羣臣奏告天地宗廟宮觀岳瀆諸陵

至明年以邊事肅清命原祈禱官各詣致謝

景定元年六月以冊立皇太子奏告天地宗廟社稷宮觀

禮志曰高宗建炎以後事有關於國體者皆告紹興九年金人遣使議和割地十一年詔撰講和誓文二十四年進徽宗御集二十六年進太后回鑾事實二十七年進玉牒仙源類譜明年進神宗寶訓祖宗仙源積慶圖徽宗實錄祐陵迎奉錄三十一年金人叛盟興師開禧二年吳曦伏誅

二事已載馬瑞

臨前考

嘉定七年進高宗中興經武要畧十三年進

宗藩慶系錄刊正憲聖慈烈皇后聖德事跡進光

宗玉牒十四年進孝宗寶訓十五年得玉璽明年

上玉璽端平元年獲完顏守緒函骨

事見前

淳祐五

年進光宗寧宗兩朝寶訓經武要畧玉牒日厯會
要寶祐元年皇女延昌公主進封瑞國公主又封
昇國五年進中興四朝史景定二年進孝宗光宗
實錄皇女周國公主下降咸淳四年安奉寧宗理
宗實錄御集會要經武要畧皆告天地宗廟社稷
攢陵其餘即位改元受禪冊寶皇子生冠及巡幸

納降獻俘之屬並仍舊制

臣等謹按南宋告祭之禮備見禮志今採其立君征伐之大者著於篇而以志文類載於末歷朝掌故藉以考見遼金元明倣此

遼太祖元年正月命有司設壇於舒伊旺尼珠琿溫燔柴告天即皇帝位

天顯元年正月以降渤海大譔譔祭告天地

太宗天顯四年

仍太祖元不改

十一月以出師雲中告天地

又命大內特哩袞告出師於太祖行宮

六年八月皇子舒魯生告太祖廟

十一年閏十一月以破唐師立石敬瑭為帝祀天地以告成功

十二年正月告功太祖行宮

穆宗應歷九年十二月以王子迪里等謀反事敗告祀天地祖宗

景宗乾亨二年十月以將南伐命巫者祠天地及兵神

祭旗鼓

聖宗統和四年三月以親征宋告陵廟山川

至四月裕悅休格以捷報帝以酒脯祭天地丙辰復
涿州告天地六月皇太妃諸王公主迎帝嶺表設御
幄道旁置景宗御容率從臣進酒陳俘獲於前遂大
宴七月以復朔州之捷告天地

六年八月以將伐宋遣使祭木葉山九月祭旗鼓

十六年五月祠木葉山告來歲南伐

二十年九月謁顯陵告南伐捷

親征告祭儀

將出師必先告廟乃立三神主祭之曰先帝曰道路
曰軍旅刑青牛白馬以祭天地其祭常依獨樹無獨
樹即所舍而行之或皇帝服介冑祭諸先帝宮廟乃
閱兵將行刑牝牡鹿各一為禴祭將臨敵結馬尾祈
拜天地而後入下城克敵祭天地牲以白黑羊班師
以所獲牡牛馬各一祭天地出師以死囚還師以一

謀者植柱縛其上於所向之方亂射之矢集如蝟謂之射鬼箭

凡舉兵帝率番漢文武臣僚以青牛白馬祭告天地日神惟不拜月分命近臣告太祖以下諸陵及木葉山神乃詔諸道徵兵

臣等謹按此將行師而祭告之禮與親征儀小有同異並著之

柴冊儀

將行柴冊禮擇吉日前期置柴冊殿及壇壇之制厚積薪以木為三級壇置其上席百尺壇龍文方茵又置再生母后搜索之室皇帝入再生室行再生儀畢八部之叟前導後扈左右扶翼皇帝於冊殿之東北隅拜日畢乘馬選外戚之老者御皇帝疾馳仆御者從者以羶覆之皇帝詣高阜地大臣諸部帥列儀仗遙望以拜皇帝遣使勅曰先帝升遐有伯叔父兄在當選賢者冲人不德何以為謀羣臣對曰臣等以先

帝厚恩陛下明德咸願盡心敢有他圖皇帝令曰必
從爾等所願我将信明賞罰爾有功陟而任之爾有
罪黜而棄之若聽朕命則當謨之僉曰惟帝命是從
皇帝於其地封土石誌之遂行拜先帝御容宴享羣
臣翼日皇帝出冊殿護衛太保扶翼升壇奉七廟神
主置龍文方茵北南府宰相率羣臣園立各舉羶邊
贊祝訖樞密使奉玉寶玉冊入有司讀冊訖樞密使
稱尊號以進羣臣三稱萬歲皆拜宰相北南院大王

諸部帥進赭白羊各一羣皇帝更衣拜諸帝御容燔柴祭天遂宴羣臣賜賚各有差

遼史國語解曰積薪為壇受羣臣王冊禮畢燔柴祀天蘇尔威汗制也

告廟儀

至日昧爽臣僚朝服詣太祖廟次引臣僚合班先見御容再拜畢引班首左上至褥位再拜贊上香揖攔內上香畢復褥位再拜各祇候立定左右舉告廟祝

版於御容前跪捧中書舍人跪讀訖俛伏興退引班
首左下復位又再拜分引上殿次第進酒三分班引
出

金太祖初伐遼告於天地

時將伐遼奉宣靖皇后率諸將出門舉觴東向以遼
人荒肆不歸阿蘇並已用兵之意禱於皇天后土及
進軍寧江州次寥晦城諸路兵皆會致遼之罪申告
於天地曰世事遼國恪修職貢定烏春烏木罕之亂

破蕭哈里之衆有功不省而侵侮是加罪人阿蘇屢請不遣今將問罪於遼天地其鑒宥之

太宗天會元年九月即皇帝位告祀天地

三年八月鄂羅以遼主至京師告於太祖廟

六年八月以宋二主素服見祖廟

遂入見於乾元殿封昏德公重昏侯是日告太祖廟

海陵正隆六年十月

時世宗初勅進

以即位親告太祖廟

世宗大定二十七年三月御大安殿授皇太孫冊越七

日皇太孫謁謝太廟及山陵

章宗明昌六年五月以出師遣禮部尚書張暉告於廟社

泰和二年九月以皇子生親詣南北郊及陵廟高禰遣使報謝太清宮北嶽長白山

六年五月以宋畔盟出師告於天地太廟社稷越日親告衍慶宮

至八年六月以與宋平謁謝衍慶宮

宣宗貞祐二年五月以遷都南京詣原廟奉辭

臣等謹按禮志載奏告之儀皇帝即位加元服受尊號納后冊命巡狩征伐封祀請謚營修廟寢禘祫升祔奉安奉遷凡國有大事皆告或一室或遍告及原廟郊祀則告配帝之室並一獻禮用祝幣其載於史可考見者熙宗皇統元年海陵正隆元年世宗大定七年皆以受尊號遣官告郊社宗廟正隆則於常武殿拜天臺設位行事又大定十四年

更御名十八年受命寶成衛紹王大安二年徐邳
河清宣宗貞祐元年復舊名四年修太廟興定三
年平涼慶雲見皆告例得牽連書之以資參考云
告天地儀

常武殿拜天臺設昊天上帝當中南向皇地祇位次
西少却並用坐褥位牌及香酒脯醢等祝版三學士
院撰告祝文書寫訖進請御署訖以付禮部移文宣
徽院並差控鶴官用案舁覆以黃羅帕隨所差告官

詣祀所前一日告官等就局所致齋一日告日質明
宣徽院太常寺鋪設供具如儀閣門舍人一員太常
博士一員引告官各服其服以次就位禮直官舍人
稍前贊有司謹具請行事贊者曰拜在位者皆再拜
禮直官先引執事官各就位舍人博士次引告官詣
盥洗爵洗位北向立搯笏盥手帨手洗爵拭爵詣酒
尊所搯笏執爵司尊者舉幕酌酒告官以爵授奉爵
酒官執笏詣昊天上帝皇地祇神位前再拜每位三

上香跪奠酒訖以爵授奉爵官執笏俯伏興舉祝官
跪舉讀訖俯伏興告官再拜告畢引告官以下降復
位再拜訖詣望燎位燔祝版再拜半燎告官以下皆
退

告廟儀

前期二日太廟令掃除廟內外設告官已下次所前
一日行事官赴祀所清齋告日丑前三刻禮直官引
太廟令帥其屬入殿開室戶掃除鋪筵設几於北牖

下如時享儀禮直官帥祀祭官陳篚幣於室戶之左
陳祝版於室戶之右案上及設香案祭器皆藉以席
每位各左一籩實以鹿脯右一豆實以鹿鸞臠尊一
置於北加勺幕在殿上室戶之左北向實以酒每位
一瓶設燭於神位前又設盥爵洗位橫街之南稍東
設告官褥位於殿下東階之南西向餘官在其後稍
南又設望燎位西神門外之北日未明禮直官引太
祝令太祝宮闈令入當階間北面西上立定奉禮贊

再拜訖升自西階太祝宮闈令各入室出神主設於位如常儀次引告官入就位禮直官稍前贊有司謹具請行事又贊再拜在位者拜訖禮直官引告官就盥洗位盥手訖詣神位前搢笏跪三上香執事者以幣授奉禮郎西向授告官告官受幣奠訖執笏俯伏興退就戶外位再拜詣次位行禮如上儀訖降復位少頃引告官再詣爵洗位讀祝舉祝官從後至位北向立搢笏洗爵拭爵訖授執事者執笏詣酒尊所西

向立執爵執尊者舉冪酌酒告官以授執事者詣神位前北向搢笏跪執爵三祭酒執笏俯伏興退就戶外位北向立俟祝文讀訖再拜詣次位行禮如上儀訖與讀祝官皆復位禮直官贊曰再拜在位者皆再拜次引告官已下詣望燎位執事者取幣帛祝版置於燎禮直官曰燎半柴禮直官贊禮畢告官以下退署令闔廟門瘞祝於坎

皇帝躬謝儀

前三日太廟令帥其屬灑掃廟庭之內外及陳設尚
舍於廟南門之西設饌十一室殿中監帥尚舍視大
次殿又設皇帝版位於神位前北向又設飲福位於
版位西南少却又設隨拜褥位於神座前大樂令設
登歌於殿上宮縣於殿下又設皇太子位於阼階東
南又設親王位於其南稍東宗室王使相位於其後
又設太尉司徒以下行事官位於殿西階之西東向
每等異位又設文武羣官位於橫街之南東西向又

設御洗位於阼階之東又設太尉洗位於西階下橫街之南又設齋卽位於東班羣官之後又設盥洗等官并奉禮贊者大司樂協律郎大樂令等位各如祫享之儀又設尊彝祭器等於殿之上下如時享之儀前一日禮官御史帥其屬省牲視濯滌如常儀其日質明禮官御史帥太廟官太祝官宮闈令出神主如時享儀有司列黃麾仗二千人於應天門外尚輦進金輅於應天門內午後三刻宣徽院奏請皇帝赴齋

宿殿文武羣官並齋宿於所司次日質明俟諸衛各
勒所部屯門列仗導駕官分左右侍立於殿階下並
朝服通事舍人引侍中詣齋殿俯伏跪稱臣某言請
中嚴俯伏興凡侍中奏請準此皇帝服通天冠絳紗
袍少頃侍中奏外辦皇帝出齋殿即御座羣官起居
訖侍中奏請升輦皇帝升輦以出侍衛警蹕如常儀
導駕官前導至應天門侍中奏請降輦升輅皇帝升
輅門下侍郎俯伏跪奏請車駕進發俯伏興凡門下

侍郎奏請準此車駕動警蹕如常儀至應天門外門
下侍郎奏請車駕少駐勅侍臣上馬侍中前承旨退
稱曰制可門下侍郎退傳制稱侍臣上馬通事舍人
承傳勅侍臣上馬導駕官分左右前導門下侍郎奏
請車駕進發車駕動稱警蹕不鳴鼓吹典贊儀引皇
太子常服乘馬至廟中幕次更服遠遊冠朱明衣執
圭通事舍人文武羣官並朝服於廟門外班迎車駕
至廟門侍中於輅前奏請降輅導駕官步入廟門稍

東侍中奏請升輦皇帝升輦繖扇侍衛如常儀至大
次侍中奏請降輦入就大次皇帝入大次通事舍人
分引文武羣官由南神東西偏門入廟庭東西相向
立禮直官引太尉以下行事官詣橫街北向再拜訖
禮直官引太尉詣盥洗位搢笏盥手帨手執笏詣爵
洗位北向立搢笏洗瓚拭瓚以瓚授執事者執笏由
西階升殿詣始祖尊彝所西向立執事者以瓚承太
尉太尉搢笏執瓚酌鬯詣神位前以鬯裸地訖以虛

瓚授執事者執笏俯伏興出戶外北向再拜訖次詣
隨室並如上儀禮畢降自西階復位禮直官引司徒
出詣饌所引薦俎齋卽奉俎並薦籩豆簠簋官奉籩
豆簠簋及大官令以序入自正門宮縣樂作至太階
樂止諸太祝迎於階上各設於神座前先薦牛次薦
羊次薦豕訖禮直官引司徒以下降階復位典贊儀
引皇太子通事舍人引親王由南神東偏門入詣褥
位禮直官引中書侍郎舉冊官等升自西階詣始祖

室前東西立通事舍人引侍中詣大次前奏請中嚴
皇帝服衮冕少頃侍中奏外辦侍中詣廟庭本位立
皇帝將出大次禮儀使與太常卿贊導凡禮儀使與
太常卿贊導並博士前引俯伏跪稱臣某贊導皇帝
行禮俯伏興前導至東神門撤繖扇近侍者從入殿
中監跪進鎮圭禮儀使奏請執圭皇帝執圭宮縣樂
作奏請詣疊洗位至位樂止內侍跪取匱興沃水又
內侍跪取槃承水時寒預備溫水禮儀使奏請搢鎮

主皇帝搢鎮圭盥手內侍跪取巾於篚興進皇帝洗
手訖奉爵官以爵跪進皇帝受爵內匱沃水又內侍
跪捧盤承水皇帝洗爵訖內侍跪奉巾以進皇帝拭
爵訖內侍捧槃匱又奠巾於篚奉爵官受爵禮儀使
奏請執鎮圭前導皇帝升殿左右侍從量人數升官
縣樂作皇帝至阼階下樂止皇帝升自阼階登歌樂
作禮儀使前導皇帝至版位樂止奏請再拜奉禮郎
贊皇太子以下在位羣官皆再拜贊者承傳皆再拜

禮儀使前導皇帝詣始祖尊彝前樂作至尊所樂止
奉爵官以爵涖尊執尊者舉冪侍中跪酌犧尊之泛
齊訖禮儀使導皇帝至版位再拜訖禮儀使奏請詣
始祖神位前褥位登歌樂作禮儀使奏請搢圭跪奉
爵官以爵授奉爵酒官以進禮儀使奏請執爵皇帝
執爵三奠酒訖以虛爵授奉爵酒官禮儀使奏請執
圭興樂止奉爵酒以爵授奉爵官禮儀使奏請詣隨
室並如上儀禮直官先引司徒升自西階立於飲福

位之側酌獻將畢奉酢酌福酒太祝從司徒立於其側酌獻畢侍中立於其側禮儀使奏請皇帝至版位北向立登歌樂作至位樂止中書侍郎跪讀冊訖舉冊官奠訖禮儀使奏請皇帝再拜拜訖禮儀使奏請詣飲福位登歌樂作至位太祝酌福酒於爵時寒預備溫酒以奉侍中侍中受爵奉以立禮儀使奏請搢圭跪侍中以爵北向跪以進禮儀使奏請執爵三祭酒禮儀使奏請飲福飲福訖以虛爵授侍中禮儀使奏

請受脤司徒跪以黍稷飭籩進皇帝受以授左右司徒又跪以胙肉進皇帝受以授左右禮儀使奏請執圭興再拜訖樂止禮儀使前導皇帝還版位登歌樂作至位樂止太祝各進撤籩豆登歌樂作卒徹樂止奉禮曰賜胙贊皇太子已下在位羣官皆再拜贊者承傳皆再拜官縣作一成止禮儀使奏請皇帝再拜奉禮即贊皇太子已下在位官皆再拜拜訖禮儀使奏禮畢導皇帝降阼階登歌樂作至階下樂止官縣

作前導皇帝出東神門樂止繖扇侍衛如常儀禮儀使奏請釋主殿中監跪受鎮圭至大次轉仗衛於還途如來儀禮官御史帥其屬納神主藏冊如儀少頃通事舍人引侍中奏請中嚴皇帝服通天冠絳紗袍少頃侍中奏外辦侯尚輦進輦侍中奏請降座升輦皇帝升輦繖扇侍衛如常儀至南神門稍東侍中奏請降輦步出廟門至輅侍中奏請升輅皇帝升輅門下侍即奏請車駕少駐勅侍臣上馬侍臣前承旨退

稱曰制可門下侍郎退傳制稱侍臣上馬通事舍人
承傳勅侍臣上馬車駕還內鼓吹振作至應天門外
百官班迎起居宮縣奏采茨之曲入應天門內侍中
奏請降輅乘輦皇帝降輅乘輦以入繖扇侍衛警蹕
如常儀皇帝入宮至致齋殿侍中奏解嚴通事舍人
承旨勅羣臣各還次將士各還本所

元憲宗二年七月命皇弟呼必賚

即世祖

征大理諸王禡

牙西行

七年六月謁太祖行宮祭旗鼓

八年十一月命皇弟呼必賚統諸路蒙古漢軍伐宋禡
牙於開平東北

世祖至元十三年五月以平宋遣官告祭天地祖宗於
上都之近郊

中書下太常議定儀物以聞命以國禮行事並遣使
代祀嶽瀆

成宗大德九年六月以立皇太子遣中書右丞相哈喇

哈斯告昊天上帝御史臺大夫特古勒德爾告太廟

十一年七月

時武宗
已即位

命御史臺大夫特古勒德爾知樞

密院事塔爾呼岱中書平章政事綽和爾以即位告謝
南郊又命特古勒德爾塔爾呼岱綽和爾告社稷

南郊主用柏素質元書為即位告謝之始

臣等謹按世祖至元十二年十二月以受尊號遣
使預告天地下太常檢討唐宋金舊儀於國陽麗
正門東南七里建祭臺設昊天上帝皇地祇位二

行一獻禮其後三十一年四月成宗初即位遣司徒諤都岱平章政事博果密左丞張九思帥百官為大行皇帝請謚於南郊為告天請謚之始志云為壇於都城南七里蓋即十二年建壇故處也嗣後國有大典禮皆即南郊告謝不備書

祭告天地三獻儀

大德十一年定

告前三日三獻官諸執事官具公服赴中書省受誓戒前一日未正二刻省牲器告日質明三獻官以下

諸執事官各具法服禮直官引監祭禮以下諸執事
官先入就位立定監祭禮點視陳設畢復位立定大
官令率齋郎出禮直官引三獻司徒太常禮儀院使
光祿卿各就位立定禮直官贊曰有司謹具請行事
降神樂作六成止太常禮儀院使燔牲首復位立定
奉禮贊三獻以下皆再拜就位禮直官引初獻詣盥
洗位盥手訖升壇詣昊天上帝位前北向立搢笏跪
三上香奠玉帛出笏俯伏興再拜訖降復位禮直官

引初獻詣盥洗位盥手訖詣爵洗位洗爵拭爵訖詣酒尊所酌酒訖請詣昊天上帝神位前北向搢笏跪三上香執爵三祭酒於茅苴出笏俯伏興俟讀祝訖再拜平身請詣皇地祇酒尊所酌獻並如上儀俱畢復位禮直官引亞獻並如初獻之儀惟不讀祝降復位禮直官引終獻並如亞獻之儀降復位奉禮贊賜昨衆官再拜在位者皆再拜禮直官引三獻司徒太常卿光祿卿監祭監禮等官請詣望燎位南向立定

俟燎玉幣祝版禮直官贊可燎禮畢

祭告天地一獻儀

至元十二年定

告前二日郊祀令掃除壇壝內外翰林國史院學士
撰寫祝文前一日告官等各公服捧祝版進請御署
訖同御香上尊酒如常儀迎至祠所齋宿告日質明
前三刻禮直官引郊祀令率其屬詣壇鋪筵陳設如
儀禮直官二員引告官等各具紫服以次就位東向
立定禮直官稍前曰有司謹具請行事贊者曰再拜

皆再拜禮直官先引執事官各就位次詣告官前曰
請詣盥洗爵洗位至位北向立搢笏以下皆贊盥手
悅手洗爵拭爵出笏詣酒尊所搢笏執爵司尊者舉
冪良醞令酌酒告官以爵授執事者出笏詣昊天
帝皇地祇神位前北向立稍前搢笏跪三上香三祭
酒以爵授捧爵官出笏俯伏興舉祝官跪舉祝讀祝
官跪讀祝讀訖舉祝官奠祝版於案俯伏興告官再
拜引告官以下降復位禮直官贊曰再拜皆再拜詣

望燎位燔祝版半燎告官以下皆退瘞之於祭所

攝行告謝宗廟儀

告前三日三獻官以下諸執事官各具公服赴中書省受誓戒告前一日未正二刻省牲器至期質明三獻官以下諸執事者各服法服禮直官引太常卿監祭御史監禮博士五令諸執事官先入就位禮直官引監祭監禮點視陳設畢復位禮直官引太常卿監祭監禮太廟令太祝官闡令奉遷各室神主訖降自

橫街北向立定奉禮卽贊再拜在位官皆再拜訖奉
禮卽贊各就位訖大官令齋卽出禮直官引三獻司
徒光祿卿捧瓚爵盥爵洗官入就位立定禮直官贊
有司謹具請行事降神樂作九成止奉禮卽贊再拜
三獻以下再拜訖奉禮卽贊諸執事者各就位立定
禮直官引初獻詣盥洗位盥手詣爵洗位洗瓚詣第
一室酒尊所酌鬱鬯詣神座前北向跪搯笏三上香
奠幣執瓚以鬯灌於沙池執笏俯伏興出室外再

拜訖次詣各室並如上儀俱畢降復位司徒率齋郎
進饌如常儀奠畢降復位禮直官引初獻詣盥洗位
盥手詣爵洗位洗爵詣第一室酒尊所酌酒詣神座
前北向搢笏跪三上香執爵三祭酒於茅苴以爵授
執事者執笏俯伏興出室戶外北向立俟讀祝官讀
祝文訖再拜詣每室並如上儀俱畢降復位禮直官
引亞獻官盥手洗爵酌獻並如初獻儀惟不讀祝俱
畢降復位禮直官引終獻並如亞獻儀俱畢復位太

祝撒籩豆奉禮郎贊賜胙衆官再拜在位官皆再拜
訖禮直官引三獻官司徒太常卿監祭監禮視焚祝
版幣帛禮直官贊可瘞禮畢太常卿監祭監禮升納
神主訖降自橫街奉禮郎贊再拜在位官皆再拜訖
退

攝行告廟儀

如受尊號上太皇太后皇太后冊寶冊立
皇后皇太子凡國家大典禮皆告宗廟

前期二日太廟令掃除內外翰林國史院學士譔寫
祝文前一日告官等致齋一日其日告官等各服紫

服奉祝版進請御署訖差控鶴用紅羅銷金案擡昇
覆以黃羅帕并奉御香御酒如常儀迎至祝所齋宿
告日質明前三刻禮直官引太廟令率其屬入廟殿
開室陳設如儀禮直官引告官等各服紫服以次入
就位東向立定禮直官稍前贊曰有司謹具請行事
贊者曰再拜在位者皆再拜禮直官先引執事者各
就位次引告官詣盥洗爵洗位北向立搢笏盥手悅
手洗爵拭爵訖執笏請詣酒尊所搢笏執爵司尊者

舉冪良醞令酌酒以爵授奉爵官執笏詣太祖室再拜執事者奉香告官搢笏跪三上香執爵三祭酒以虛爵授奉爵官執笏俯伏興舉祝官搢笏跪對舉祝讀祝官跪讀祝文訖奠祝於案執笏俯伏興禮直官贊告官再拜畢每室並如上儀告畢引告官以下降復位再拜訖詣望座燭祝再拜半燎告官以下皆退告祭社稷儀

告前三日三獻官以下諸執事官各具公服赴中書

省受誓戒告前一日省牲器告日質明三獻官以下
諸執事各服其服禮直官引監祭監禮以下諸執事
官入自北牖下南向立定奉禮郎贊曰再拜在位官
皆再拜訖奉禮郎贊曰各就位立定監祭監禮視陳
設畢復位立定禮直官引三獻司徒太常卿光祿卿
入就位立定禮直官贊有司謹具請行事降神樂作
八成止太常卿瘞血復位立定奉禮郎贊再拜皆再
拜訖禮直官引初獻官詣盥洗位盥手訖詣社壇正

位神座前南向搢笏跪三上香奠玉幣執笏俯伏興
再拜訖詣配位神座前西向搢笏跪三上香奠幣執
笏俯伏興再拜訖詣稷壇盥洗位盥手訖升壇並如
上儀俱畢降復位司徒率齋郎進饌奠訖降復位禮
直官引初獻官詣盥洗位盥手訖詣爵洗位洗爵訖
詣酒尊所酌酒訖詣社壇神位座前南向立搢笏跪
三上香執爵三祭酒於茅苴爵授執事者執笏俯伏
興俟讀祝官讀祝文訖再拜興詣酒尊所酌酒訖詣

配位神座前西向楷笏跪三上香執爵三祭酒於茅
苴爵授執事者執笏俯伏興俟讀祝文訖再拜興詣
稷壇盥洗位盥手洗爵酌獻並如上儀俱畢降復位
禮直官引亞獻終獻並如初獻之儀惟不讀祝俱畢
降復位太祝徹籩豆訖奉禮卽贊賜胙衆官再拜訖
禮直官引三獻司徒太常卿詣瘞坎位南向立定禮
直官贊可瘞禮畢出禮直官引監祭監禮太祝齋卽
至北牖下南向立定奉禮贊再拜皆再拜訖出

明太祖吳元年十月命將出師祭告神祇

時命將分討中原廣西福建親祭神祇於北門之七里山十一月命廖永忠副湯和取慶元溫台諸郡親祭海上諸神

十二月帝御新宮以羣臣推戴之意告於上帝

祝曰自宋運告終帝命真人於沙漠入中國為天下主百有餘年今運亦終豪傑分爭惟臣某帝賜英賢為輔遂勘定諸雄息民於田野諸臣皆曰生民無主

必欲推尊帝號臣不獲辭不敢不告是用明年正月
四日於鍾山之陽設壇備儀昭告帝祇惟簡在帝心
如臣可為生民主告祭之日帝祇來臨天朗氣清如
臣不可當有烈風異景使臣知之至日天宇廓清星
緯明朗禮成遂即位於郊壇南

洪武元年六月帝幸汴梁躬祀諸神仍遣官致祭境內
山川

三年四月以封建諸王告太廟

秦王祺等謁謝太廟如時享之儀九年正月以諸王將之藩分日祭告太廟社稷嶽鎮海瀆及天下名山大川復告祀天地於園丘初諸王來朝還藩祭真武等神於端門用羊豕九制帛等物祭護衛旗纛於承天門亦如之二十六年定制豕一羊一不用帛尋罷端門祭惟用葷素二壇祭於承天門外

臣等謹按永樂以後諸王分封告廟之禮悉秉祖制不具載

六月以獲密迪哩已拉祭告郊廟

是年五月李文忠克應昌元嗣君北走獲其子密迪哩已拉六月至京師羣臣請獻俘不許封為崇禮侯告捷於南郊翼日告太廟十一月北征師還告武成於郊廟

四年正月以伐明昇祭告神祇

四月命將會勦再行祭告

六年正月遣徐達等鎮北邊祭告神祇

時禮部尚書牛諒定議有事祭告設神位二十八壇
中太歲風雲雷雨五嶽五鎮四海凡五壇東四瀆京
畿湖廣山東河南北平廣西四川甘肅山川夏冬二
季月將京都城隍凡十二壇西鍾山江西浙江福建
山西陝西廣東遼東山川春秋二季月將旗纛戰船
等神凡十一壇若親祀皇帝皮弁服一獻每三壇一
行禮

臣等謹按禮志諒奏太歲諸神祈報則設十五壇

有事祭告則設二十八壇蓋祈報止及京畿甘肅山川而祭告則遍及天下山川故為壇多寡異也八年四月駐驛中都祭告天地於中都之圜丘

祝曰昔元政不綱英雄並奮皇天后土授命於臣八年以來除民禍殃當師旅臨江之時臣每詢儒臣皆曰有天下者非都中原不能控制迨平定中原臣即至汴意在建都以安天下及觀生民凋弊轉輸艱難恐益勞民遂命羣臣會議僉以濠地古之鍾離於此

建都庶合古今之宜用兩更郡名建立都城土木之役實勞民力功將告成惟上帝后土是鑒

二十五年九月冊立皇第三孫允炆為皇太孫祭告太廟

惠帝建文元年八月命長興侯耿炳文為征虜大將軍帥師討燕祭告郊廟社稷

臣等謹按草朝志元年八月朔遣炳文北伐明史成祖紀亦曰八月天子以耿炳文為大將軍帥師

致討獨惠帝紀繫其事於八月己酉之前蓋誤今
正之

三年正月享太廟告東昌捷

成祖永樂七年二月以北巡告郊廟社稷

並祭孝陵及大江旗纛諸神輟於承天門遣官祭所
過山川陵廟將至設壇望祭北京山川諸神三月至
北京於奉天殿丹陛設壇告天地遣官祭山川城隍
諸神

八年正月以親征北邊書諭皇太子代告郊廟社稷
二月輟於承天門遣官祭太歲旗纛諸神所過名山
大川遣祭如巡狩禮

宣宗宣德元年八月親征高煦祭告郊廟社稷百神

九月還京師親告郊廟社稷行謁謝禮

三年八月以巡邊告太廟

九月還京師謁告如前

英宗正統六年二月以征麓川叛寇遣官祭告郊廟社

稷山川及雲南境內山川之神

八月再討麓川祭告如前十四年二月麓川平再行祭告

十四年七月以親征幹拉遣官祭告廟社

九月景帝即位告郊廟社稷

景帝景泰元年八月以太上皇帝還京師遣官祭告郊廟社稷山川

六年十一月以征湖廣苗寇遣官告祭郊廟社稷

英宗天順元年正月以復位改元告祭郊廟社稷諸陵
武宗正德十四年八月帝將南征遣官告郊廟

先是正月帝自加太師諭禮部曰總督軍務威武大
將軍總兵官太師鎮國公朱壽將巡兩畿山東祀神
祈福其具儀以聞羣臣諫者咸予杖六月寧王宸濠
反帝親征十二月至南京時宸濠已就擒十五年十
二月誅宸濠帝還京師告捷於郊廟社稷

十六年四月興獻王長子厚熜嗣位遣官告祭廟社

武宗崩遺詔以王嗣位是月癸卯至京師羣臣即郊
外上箋勸進是日入自大明門遣官告廟社

世宗嘉靖十七年四月以皇嗣應祈告謝郊廟遣官祀
方澤社稷日月神祇諸陵山道道士分祀嶽鎮海瀆
十八年二月以南狩告祭元極寶殿及太祖睿宗廟遣
官告北郊社稷諸神祇

次真定望於北嶽渡河祭大河之神次鈞州望於中
嶽既至承天享帝於飛龍殿秩於國社國稷徧羣祀

四月至京師告謝如初

三十二年九月以諸邊報捷祭告郊廟社稷

三十三年十月以南北奏捷告謝如前三十五年九月平浙江倭四十一年六月逆賊張連等平並遣告如例

神宗萬曆八年五月以廣西大捷遣官告郊廟社稷
十九年十月擒斬番賊二十九年十二月寧夏宣捷
並遣官祭告郊廟

熹宗天啟元年五月以黔苗宣捷遣官祭告郊廟

二年十一月四川獻俘三年閏十月延綏寧夏甘肅
告捷七年三月平定雲南武尋嵩諸處並遣官祭告
郊廟

臣等謹按明制登極巡幸及上謚葬陵冊立冊封
冠婚等皆祭告天地宗廟社稷凡營造宮室及命
將出師歲時旱潦祭告天地山川太廟社稷凡即
位之初並祭告闕里孔廟及歷代帝王陵寢其以

他事告者建文三年正月凝命寶成嘉靖七年四月甘露降四十四年六月芝生睿宗原廟隆慶五年六月俺答貢馬皆告郊廟至世宗時四方貢白兔白鹿芝草若白兔生子獲仙藥於御座亦告則又誣誕不經之甚者具見於史因並載之

親征告祭儀

前期擇日祭告天地宗社皇帝服武弁乘草路備六軍具牲幣作樂皆行三獻禮如常祭儀凱旋告祭與

出師同獻俘於廟南門外社則北門外

禡祭儀

前期皇帝及大將陪祭官皆齋一日前一日皇帝通天冠絳紗袍省牲詣神厨視鼎鑊滌漑執事設軍牙六纛於廟中之北軍牙東六纛西邊豆十二簠簋各二鉶登俎各三設瘞坎位於神位西北設席於坎前上置酒碗五雄鷄五餘陳設如常儀祭日建牙旗六纛於神位後皇帝服武弁自左南門入至廟庭南正

中北向立大將及陪祭官分文武重行班於後迎神
再拜奠幣行初獻禮先詣軍牙神位前再詣六纛神
位前俱再拜亞獻終獻如之惟初獻讀祝詣飲福位
再拜飲福受胙又再拜掌祭官徹豆送神復再拜執
事官各以祝幣掌祭官取饌詣燎所太常奏請望燎
執事殺雞刺血於酒碗中酬神燎畢奏禮畢駕還若
遣將則於旗纛廟壇前行三獻禮大將初獻諸將亞
獻終獻

其遣將造廟宜社禮即命大將軍具牲幣行一獻禮
與遣官祭告廟社儀同告武成王廟儀前二日大將
省牲祭日大將於幕次僉祝版入就位再拜詣神位
前上香奠帛再拜進熟酌獻讀祝再拜詣位再拜飲
福受胙復再拜徹豆望燎其配位亦大將行禮兩廡
陪祀諸將分獻

欽定續文獻通考卷七十六